



Kin-á-jit Iû-gôan

Beh Koh-òah

Koa Kí-hòa gôan-tù

Chhòa Khun-siú kái-siá

Tī chia chhut-sì

Tī chia tōa-hàn

M̄-kú ū chit jít thàu-chá chhéⁿ--khí--lâi

Sòa hoat-kak tē-tô í-keng piàn-sek

Chū án-ni góan chiū sit-khì chū-iū

Lô-lē bōe-tàng siū-khì

Chhùi hō in chhiúⁿ--khì

Lâng tī thô-kha pē

Kiau-ngō ê chú-lâng

Bú-jiók ê òe-gú chhák tiòh góan ê sim-koaⁿ

Iā chí-ū tiām-tiām-á jím-siū

Jím bōe-tiâu bák-khō âng

Iā chóat-tùi bô lâu bák-sái

Chóng ū chit jít

Chóng ū chit jít góan òe chhut-thâu-thiⁿ

Ták-jít án-ni khng ka-kī

Góan kin-á-jit iû-gôan beh koh òah

Bák-chiu kām bák-sái

Kin-á-jit iû-gôan kè-siók beh koh-òah

Niú-suh

2001 nî 12 gòeh chhe 1, lán KLH khi Pîn-tong ê Lāi-pō kap Bān-kim khòaⁿ kó-chek. Tiuⁿ Hók-chū hōe-tiúⁿ chhōa-thâu, hōe-gôan kap hōe-iú kā 1 tâi bá-suh chē kàu tīⁿ-tīⁿ. Chit chōa m̄-nā khòaⁿ tiòh Lāi-pō kheh-chng ê tōa-hiā-chhù, koh ū pài-hóng Bān-kim ê Thian-chú-kàu tng. Siōng kài hó-khang..ê sī ē-sái sék-sāi Bān-kim Makatau gôan-chū-bîn Phoaⁿ--Sian--siⁿ. I siōng-sè kā lán kái-soeh Thian-chú-tng ê lèk-sú, kiàn-tiòk kap hong-siòk, koh ēng gôan-chū-bîn ê koan-tiám, khui-phoah chē-chē lâng ê “Tâi-ôan-lâng sī Hàn-jîn” ê bì-su(myth). I kià-bāng tãi-ke m̄-thang khin-piat gôan-chū-bîn, kín-kín kiát-háp cheng-lâng ê khui-lát, kiàn-lip pún-thó ê chú-thé-seng, kè-siók ūi kiáⁿ-sun phah-piàⁿ.

Hó-khang ê Hák-síp Ki-hōe

Lán KLH ê kàu-hák jú lâi jú chhia-iāⁿ. Tū liáu kú-té ê chhō-kip-pan kap tióng-kip-pan í-gōa, koh beh khui Kè-siók Kàu-iók-pan. Lán chai-iaⁿ chiong-kî it-seng ê hák-síp sī kàu-iók ê chòe tióng-tiám. Hiān-chhú-sī ê kàu-iók sī ūi tiòh bī-lâi ê kàu-iók chò chún-pī, só-í lán koat-tēng beh koh khui Kè-siók Kàu-iók-pan lâi ôan-sêng chit-ê bók-phiau. Pò-miá ê chu-keh sī KLH tióng-kip-pan pit-giáp. Khò-thēng ū Tâi-gí Gí-giân-hák, Tâi-ôan Lèk-sú, Gí-im Hók-síp, Tâi-gí Tiān-náu kap Bāng-lō ê sú-iōng, phng-phài koh chhe-chhau. Ûi 2001/12/25 khai-sí múi lé-pài 2, 7:00 kàu 9:30 pm tiàm Ko-I W21 kàu-sek siōng-khò. Khò-thēng lóng-chóng sī 25 tiám-cheng. Lòh-bóe ū chhek-giām, thong-kòe..ê pan-hoat kiát-giáp cheng-su. Siūⁿ beh chham-ka ê lâng chhiáⁿ kā Tiuⁿ Hók-chū I-su pò-miá.